

倪健民甲辰诗词选

■ 清平乐·庆祝共和国七十五周年华诞

红旗如织。欢庆欣生色。七十五年齐努力。继往开来强国。

神舟天外翱翔。北斗寰宇导航。喜看加鞭快马，同心绘就华章。

■ 泸沽湖

水阔碧无瑕，吹香海藻花。
槽船多唱渡，诗客欲咨嗟。
光耀一湖玉，波浮两袖霞。
摩梭歌浪漫，篝火远林遮。

■ 丽江山中

飘渺烟霞过玉崖，诸峰如沐静无涯。
山间小坐云牵袖，溪畔闲行月入怀。
林语鸟声皆悦耳，花香竹韵共清斋。
尘嚣远隔寻幽径，心性空明境益佳。

■ 荣荣十岁生日励志有赠

少年勤读圣贤书，仁德良才总相如。
博学深雄怀壮志，乾乾正气接之初。

■ 感兴

十载春秋迹可知，又成书稿感怀时。
被愁宜入陶公境，解闷何妨杜曲词。
意匠八紘期垒玉，心源千仞欲吟诗。
云涛万斛胸间涌，只酿荷风不酿痴。

■ 依韵林峰先生《一年今日最分明》

江风猎猎动霜秋，旧月潮移渐上楼。
山翠压波沧浪寂，水颺盈袖屢云浮。
琴心星夜驱寒露，笔意华灯照冷舟。
遥望一轮烟霭外，还乡黍味尽消愁。

■ 次韵敬和周文彰会长

《中秋节邀您共品诗和月(新韵)》

万翠凝冰皎，霜花子夜寻。
寒蟾凉浸发，云汉浪袭人。
风露今宵重，亏盈翌日轮。
横笛飞一曲，吹断总缘魂。

■ 秋节

清溪翻百岭，玉珮响千滩。
落叶捎云舞，飞花映月寒。
庭空来鸟迹，径老掩枫丹。
唾手得佳节，同应载酒欢。

■ 秋山

风鸣千叶舞，荷谢柳无残。
木落秋山瘦，霜飞素月寒。
林疏长细影，骥老淡华鬃。
萸菊凌霄耀，京杭两地看。

■ 秋野

江南秋已劲，塞北草初黄。
一晌繁花谢，三山丹桂香。
村鸡避野地，涧竹响幽塘。
天静夕阳好，楼心万缕光。

■ 曜曜入学励志有赠

长风鹏翼起，志学读书堂。
厚德立身本，清心知礼章。
登高天地阔，致远锦帆扬。
家国添新彩，明朝成栋梁。

■ 秋山吟

青峰多隐秀，奇彩菊篱黄。
夜雨时时冷，秋花阵阵香。
云山天共远，竹柏翠相彰。
小蝶飞来去，悠然弄晚芳。

■ 香山植物园

徒步携孙伴，霞光叠彩坳。
云浮晴绕树，花落鸟归巢。
净耳千泉出，遐心百岭交。
秋华无价买，红叶晚风捎。

■ 瓜沥忆旧

瓜沥谢家弄，苔痕岁月苍。
幽檐听雨响，老树拂风凉。
最忆石青路，常怀水碧塘。
旧居思父母，秋色断人肠。

■ 夜宿桐江

日夜潮声里，犹如响鼓槌。
观风轻舞叶，听雨细敲窗。
渡静渔舟独，潭清白鹭双。
玲珑三峡美，不用到长江。

■ 访七里泷

古渡入空濛，寻幽七里泷。
水颺吹袖冷，山翠和波融。
洄洑菰蒲净，溯流荷芰丰。
朦胧如画境，烟雨亦天工。

■ 秋晚

山色空濛烟树苍，河塘霜落石砭凉。
云牵雁影划秋水，风卷芦花舞夕阳。
林语幽深修竹冷，客怀悲健古樟昂。
寒潮白露四维静，皓月清江一道黄。

■ 寒衣节思双亲

风叶已吹廊，摇枝思更长。
月弯如梦短，空碧感云凉。
怀桔陆郎意，投蚊吴猛方。
而今亲不在，寄泪泪苍苍。

■ 黄龙洞

神潭碧水卧龙盘，翠谷幽声入耳寒。
不见大云腾涧壑，琅琅悬滴和风弹。

■ 南乡子·玉泉菊花展

满径菊花香。霜蕊寒英绕绿廊。如梦旧游鸣玉处，茫茫。秋去冬来肃气凉。

曾记好时光。秀丽清泉映我娘。目送朵云天地远，心伤。万里商声总断肠。

■ 卧佛寺腊梅

腊月寺中犹见花，冷香清雅影疏斜。
檀心浅露春妆面，能映天边一片霞。

■ 园中闲坐

园中清坐久，闲赏四时春。
碧竹掩坪径，幽馨暖阁尘。
茶凉回味淡，天静悟心真。
世事皆如梦，悠然过此身。

■ 半园

半园果树半园菜，半榻鸣琴半醉斋。
一径余闲还竹影，天高海阔白云怀。

■ 半岛闲居

谡谡风涛渐起潮，山窗海月夜迢迢。
案头几许春消息，但捧花笺待玉箫。

■ 尖峰岭

尖峰云上立，翠色染青天。
古木千年卧，瑶池百丈连。
唤鱼潭弄影，引鸟岭听禅。
此地有真气，长生不老泉。

■ 慈母两周年祭述哀

贱子失慈母，哀思又一年。
山孤云水冷，雨滴泪珠连。
梦里难温影，尘间如逝烟。
悲声融暮色，大野朔风咽。

■ 除夕

钟声辞旧岁，爆竹待新年。
斟酒驱寒腊，焚香拜祖先。
星稀云路隔，影渺梦魂牵。
家祭情犹切，祈文上九天。

■ 新年感怀

木火相生逢乙巳，年华七二对佳辰。
桃符爆竹迎新岁，鹊语莺声化景春。
绿蚁轻斟抬箸暖，红炉慢煮赋诗淳。
浮云冷雾风驱散，万里晴空不染尘。